

# Vischnaunca politica Andiaast

## Radunonza communal dils 3 da fenadur 2015

Presents: Suprastonza communal e 13 vischinas e vischins  
Perstgisas: Imelda Vincenz

### 1. Beinvegni ed elecziun dils dumbravuschs

President communal Sievi Sgier fa in cordial beinvegni tier las fatschentas publicadas. Sco dumbravuschs vegnan Christian Spescha ed Ignaz Alig proponi ed elegi unanimamein. Encunter la gliesta da tractandas dat ei neginas objecziuns.

### 2. Prelecziun ed approvaziun dil protocol dalla radunonza communal dils 05-12-2014

Il protocol dalla davosa radunonza communal dils 5 da december 2014 vegn prelegius ed approbaus unanimamein.

### 3. Damonda da credit per ils projects da fusiun

Il president Sievi Sgier informescha davart la situaziun da partenza en connex cun il tema da fusiuns. Il cantun ha decidiu il spazi da promoziun. En quel sesanfla la vischnaunca d'Andiaast ensemen cun Breil e Vuorz. Tier la votaziun dils 20 da schaner 2012 ha la populaziun d'Andiaast approbau la votaziun en connex cun ina fusiun cun la vischnaunca da Breil cun 68 vuschs gie e 21 vuschs na. Tier la vischnaunca da Vuorz ei la situaziun empau pli heicla. Il resultat ei leu numandamein curdaus cun paucas vuschs differenza encunter ina fusiun cun Breil. La suprastonza da Vuorz ha silsunter retschiert ina moziun la quala pretenda in project cun Breil ed in'iniziativa che pretenda in project cun Ilanz/Glion. Las suprastonzas dallas vischnauncas Andiaast, Breil, Ilanz/Glion e Vuorz ein sesidas ensemen per discutir la situaziun. Breil sco era Ilanz/Glion fissan prompts da conlurvar cun Andiaast e Vuorz.

Per saver elavurar ora quels dus projects ein las suprastonzas communalas stadas alla tscherca dad in partenari che sustegn las vischnauncas. La HTW Cuera a silsunter inoltrau in'offerta per menar la gruppa da project. Ursin Fetz fuss prompts da coordinar quels dus projects ed elavurar ora ensemen cun las suprastonzas communalas la fusiun cun Breil e quella cun Ilanz/Glion. Ei sto vegni quintau cun cuosts totals da frs. 45'000.00. Da quels ha la vischnaunca d'Andiaast da surprender frs. 20'000.00 e la vischnaunca da Vuorz frs. 25'000.00. Vegn ei tier ina votaziun sa vegnir quintau ch'il cantun surpren 50% dils cuosts.

**La damonda da credit per ils projects da fusiun vegn approvada cun 17 vuschs gie encunter 1 vusch na.**

### 4. Damonda da credit per la sanaziun dalla via d'uaul Pattadiras-Camartgin

Il mir da sustegn dalla via Pattadiras-Camartgin sto vegnir remplazzaus cun ina preit dad ancras (Pfahlankerwand). Ei sto vegnir quintau cun cuosts totals da frs. 50'000.00. Da quella summa surpren il cantun sco era la confederaziun 74% dils cuosts. Aschia resta ina summa da bien frs. 13'000.00 per la vischnaunca d'Andiaast.

**La damonda da credit per la sanaziun dalla via d'uaul Pattadiras-Camartgin vegn approvada unanimamein.**

## **5. Approbaziun dallas novas statutas dalla Regiun Surselva**

Sievi Sgier presenta las midadas decisivas en connex cun las novas statutas dalla Regiun Surselva. Cun quei ch'il pievel ha approbau ils 30 da november 2014 la legislaziun adesiva davart la refuorma territoriala vegnan las endisch novas regiuns a remplazzar naven digl onn 2016 ils cumins, las corporaziuns regiunalas ed ils districts. Las 18 vischnauncas naven da Tujetsch entochen Laax fuorman da niev la regiun Surselva. Las vischnauncas Flem e Trin appartegnan da niev alla regiun Plaun. Els statuts vegnan specialmein definidas la structura, l'organisaziun, las incumbensas e las cumpetenzas dalla regiun. La regiun vegn finanziada tras contribuziuns communalas, eventualas contribuziuns cantunalas e federalas e cun auters recavs sco honoraris ord lavur per incumbensa. Alla regiun vegn adossau d'ina vart incumbensas dil cantun e da l'autra vart dallas vischnauncas dalla regiun. Las vischnauncas dalla regiun san autorisar la regiun da vegnir activas tier incumbensas communalas. La vischnaunca d'Andiast ha ina vusch ella conferenza da presidents.

**Las novas statutas dalla Regiun Surselva vegnan approbadas unanimamein.**

## **6. Approbaziun dallas novas statutas dil circuit dil register funsil Glion-Lumnezia**

Il president communal dat ina cuorta survesta davart las novas statutas dil Circuit dil register funsil Glion-Lumnezia.

Il diember da vischnauncas ei dapi igl onn 1996 sereducius muort fusiuns da 32 sin 10. La structura veglia dallas corporaziuns da vischnauncas vegn remplazzada entras ina colligiaziun da vischnaunca. Tut las activas e passivas dalla corporaziun crodan al niev purtader. Era vegn la radunonza da delegai remplazzada entras la conferenza da presidents e corrispunda allas structuradas novas dalla refuorma territoriala.

Ina midada ni aboliziun dalla colligiaziun da vischnauncas sa vegnir concludida entras il surpli dallas vischnauncas colligiadas e vitier dalla pluralitad da tuttas vuschs valeivas. La midada da statutas duei entrar en vigur legala ils 01-01-2016.

**Las novas statutas dil circuit dil register funsil Glion-Lumnezia vegnan approbadas unanimamein.**

## **7. Informaziuns**

Sievi Sgier informescha ils presents davart ils projects actuals:

- Via da megliuraziun Curals – Sigliaus (~600'000.00)
- Damonda per integrar via Crappa Grossa – Pastgs project existent
- Via da quartier Carnugl (150'000.00)
- Stabiliment Alp Sura (sanaziun tegia 250'000.00)
- Aquaduct
- GEP (Genereller Entwässerungs Plan) rapport avon maun
- VOLG (regressiv, contract Vuorz, Andiast?)
- Casa da scola (lagers regressiv, organisaziun buc optimala, sanaziuns)
- Damonda da baghegiar Osterwalder (baghegiu senza lubientscha, dertgira administrativa dau raschun ad Osterwalder)

## **8. Varia**

Dil tractandum varia vegn buca fatg diever.

Finiziun dalla radunonza allas 21:30.

Andiast, ils 3 da fenadur 2015

Il president:

L'actua:

Sievi Sgier

Silvia Calzaferri